

Oostfreesland-Rekord in Kabelsalaat

IN D' LUUR

Karin Böhmer

redaktion@on-online.de



En kunn haast menen, daar sitt Gold in de Grund van Südbrookmerland. Is ja al maal een Schiev funnen worden. Man dat se nu so vergrellt drup sünd, daar Locken to graven, liggt an dat neje Gold, smeedt ut Glasfaser un dat Geld van all de Internet-Jankies. Nu is de daarde Firma drup komen, dat se in Südbrookmerland noch nich good mit Internet versörgt sünd. De Moordörpers un Vitteburers köönt bold kien Katt mehr begraven, ohn mit de Spaa in en Leitung to raken. Wenn irgendwaar en Bagger ansmeten word, kannst d'r wiss van utgahn, dat he wat dörkleddt. Un dat Lüstige is ja, dat de Kabels daar bald sinnig un sacht in d'Grund liggen, ahn dat d'r ok bloot een wat van hett. Bit de Glasfaser to trillern anfangt, sall dat in elke Fall woll noch anhollen.